

**Utoqqaat Illersuisuat pillugu Inatsisartut inatsisaata allanngortinneqarnera pillugu Inatsisartut inatsisissaat**

(Isumaginninnermut Sulisoqarnermullu Naalakkersuisoq)

**Akissuteqaat**

(Isumaginninnermut Sulisoqarnermullu Naalakkersuisoq)

**Aappassaaneerinnineq**

Naalakkersuisut Ilaqutariinnermut Peqqissutsimullu Ataatsimiititaliaq qutsavigaat peqqissaartumik suliaanik, Utoqqaat Illersuisuat pillugu Inatsisartut inatsisaata allanngortinneqarnissaanut atatillugu, siunnersuutillu ilassilluarneqarneranik.

Naalakkersuisut nuannaarutigaat ataatsimiititaliami amerlanerussuteqartut siunnersuut taamatut isikkoqartillugu ilalermassuk.

Naalakkersuisut tusaatissatut tiguaat ataatsimiititaliap kaammattuutaa eqqumaffigeqqullugu siunissami Utoqqaat Illersuisuata allattoqarfialu Nuup avataani illoqarfinnut allanut inissinneqarsinnaanera pillugu.

Naalakkersuisut maluginiarpaat ikinnerussuteqartut siunnersuut taamatut isikkoqartillugu akerlilersimamassuk. Ikinnerussuteqartut oqaaseqaataannut Naalakkersuisut imaattunik oqaaseqassapput.

Naalakkersuisut ikinnerussuteqartut isumaqatigaat utoqqarnut suliassaqarfimmi assaat kissalaartut amerlanerusut kissaatigineqarnerinik. Siunnersuut saqqummiunneqarnermisut siunertaqarpoq innuttaasut utoqqalisut illersuisoqarnissaannik, inuiaqatigiinni utoqqaat soqutigisaannik siammartitserisinnaasumik, aallussisinnaasumik paasisutissiisarsinnaasumillu utoqqaat soqutigisaannik. Utoqqaat Illersuisuat periarfissaqassaaq suliassaqarfimmi tassani susassaqartunik tamakkiisumik oqaloqateqartarnissaminut, inassuteqartarnissaminullu inuiaqatigiit qanoq pitsaanerumik utoqqarnut tunngatillugu suliassaqarfimmi pitsanngorsaasinnaanernik.

Naalakkersuisut isumaqatigaat Inatsisartut Ombudsmandiata isorinnittunik oqaaseqaatai ilumoorunneqartussaasut malinneqartartussaasullu. Ingerlaavartumik nakkutilliisoqarpoq kommunalbestyrelsit inatsisit naapertorlugu pisussaaffimminnik naammassinninniartarneri eqqarsaatigalugit. Kisianni utoqqarnut suliassaqarfimmi suliassanik ingerlatsineq tassaavoq kommunit suliassaqarfigisaat, akisussaaffillu sullissineq pillugu kommunalbestyrelsiniippoq. Naalakkersuisut anguniartuarpaat kommunalbestyrelsinut sapinngisamik pitsaanerpaamik siunnersuisarnek, taamalu innuttaasut pitsaanerpaamik sullinneqarsinnaaneri.

Naalakkersuisut isumaqatiginngilaat Utoqqaat Illersuisuata arlaannaannulluunniit atasuunnginnissaa aqutissiuunneqarsinnaanersoq Utoqqarnut Illersuisup Inatsisartunit toqqarneqartarneratigut Naalakkersuisuniunngitsoq. Siunnersuut manna siunertaqarpiarpoq qularnaarniarneqarmat Utoqqaat Illersuisuata arlaannaannulluunniit atasuunngitsutut inissisimanissaa, allattoqarfeqarnermigut Namminersorlutik Oqartussani inissisimannginnermigut.

Ilaatigut Utoqqaat Illersuisorisimasaanniit isornartorsiineq tunngavigalugu Naalakkersuisut pisariaqartissimavaat Utoqqaat Illersuisuata arlaannaannulluunniit atasuunngitsumik allattoqarfeqalernissaa. Utoqqaat Illersuisuanut periarfissaalissaaq allattoqarfik aqqutigalugu immikkut ilisimasalinnik pisariaqartunik isumasiuisalernissaaq sulisitsisalernissarlu.

Taamatut oqaaseqarluta Naalakkersuisut siunnersuut aappassaaneerneqarnissaanut ingerlateqqippaat.